

Angelo Tubino, *Gli Sprinati. Vita, Avventure e Disavventure di Carolina Conte e dei suoi 67 discendenti*, Youcanprint, Genova 2019, pagg. 192

O titolo de questo libro o faiéiva pensâ a gente bagnâ da quarche stissa d'ægoa da-o çê, e invece o l'é a coruçion dialetale de *Asplanati*, o nomme da villa de Cônâ dove l'ea nasciua a Carolinn-a Conte, a Moæ: coscì a l'ea ciamâ da tutti, capostipite e cappo indiscusso da grande famiggia di Sprinati. L'aotô o l'é un di sò nevi e, into contane a stôia da-o 1885 a-i nòstri giorni de questa famiggia feua de l'òrdenaio, avèrta a-o mondo, pinn-a de vitta e d'alegria contagioza, no solo o ne fa conosce in fotografia tutti i sò parenti, ma o ne mostra ascì comme se vivéiva inti pàixi de Cônâ e pôi de Murta, dove i Sprinati s'èan trasferîi e àivan inciantòu 'na fiorente ativitàe da òrtoen.



Mauro Balma e Giuliano d'Angiolini, *Alle origini del trallalero genovese*, Nota, Udine s.d., pagg. 96

Doe aotoritàe in mateia àn scrito questa stôia do nòstro canto ciù tradiçionale ch'ò nasce inte l'entrotæra, dove s'incontran e "Quattro Provincçe": Zena, Lusciandria, Pavia e Piaxensa. E testimonianse no van ciù inderê de l'Eutoçento e no l'é façile trovâ de registraçioin, però quarchedunn-a a gh'é e se pèuan sentì inti doî CD aleghæ a-o libbro. A l'é 'na publicaçion scientifica ch'a s'aspêta da-o letô quarche conscensa de teoria muxicale, ma l'é interessante pe tutti leze i testi, sovente in italian e pigiæ anche da-i libretti d'òpera, e vedde comme a tradiçion de squaddre de canto a l'é arivâ, pe fortun-n-a ancon viva, finn-a a-i tempi nòstri.



Giorgio Bertone, *Steva il genovese, A.D. 1130*, Erga Edizioni, Genova 2016, pagg. 208

Giorgio Bertone, *Le mura del Barbarossa, A.D. 1155*, Erga Edizioni, Genova 2016, pagg. 174

Giorgio Bertone, *Simone Boccanegra. Primo Doge di Genova. Immortale eroe verdiano, A.D. 1339*, Erga Edizioni, Genova 2016, pagg. 196

De questo aotô emmo parlòu into boletin 4/2017 pe-o seu libbro *La caduta di Costantinopoli. Il Capitano Giovanni Giustiniani. A.D. 1453*, ma o l'àiva za publicòu questi atri trei romanzi stòrichi. O Steva protagonista do primmo o l'é in zoeno mercante, ch'ò ritorna a Zena a trentecinqu'anni co-o seu gruppo de amixi dòppo tante aventue in gio pe-o Mediterànio e inti pàixi che se gh'afaccian. O secondo o l'é ambientòu into periodo da costruçion de miage da Sarzan a-a Pòrta di Vacca, 'n inpreiza colosale ch'a l'à visto i zenéixi tutti a un louâ senza risparmiu pe difende a seu çitàe. O tèrso o piggia a-a larga a vicenda do Bocaneigra faxendola precede da doî capitoli in sciâ stôia de Zena inti çent'anni primma che lè o nascesse, pe capì meglio o personaggio.

